

COVID-19 itu nyata, kerajaan perlu wajibkan pengambilan vaksin - Tun Siti Hasmah
Astro Awani
25 Mei 2021
Faris Danial Razi

KUALA LUMPUR: “Sedarlah COVID-19 ini nyata, ambillah vaksin demi keselamatan kita semua.”

Itu saranan dan daripada Tun Dr Siti Hasmah Mohd Ali yang menyeru seluruh rakyat Malaysia supaya mengambil suntikan vaksin dan menganggap COVID-19 sebagai wabak yang serius.

Dalam satu rakaman video yang dikongsikan kepada Astro AWANI, isteri kepada bekas Perdana Menteri, Tun Dr Mahathir Mohamad itu turut berpendapat, pengambilan vaksin tersebut perlu diwajibkan oleh kerajaan.

“Saya ingin beri cadangan agar pengambilan vaksin ini diwajibkan oleh pihak kerajaan supaya semua orang dapat divaksin dan kadar imuniti kelompok dapat dicapai dengan pantas seperti yang diharapkan sekali gus mengurangkan risiko jangkitan dan jumlah kematian.

“Mungkin program vaksinasi ini boleh ditambah baik dengan menyediakan perkhidmatan vaksin dari kampung ke kampung.

“Kalau ada yang tidak dapat hadir untuk ambil vaksin, maklumkan segera kepada pusat vaksin supaya vaksin itu tadi tidak dibazirkan dan boleh diberi kepada mereka yang sedang menunggu,” jelas Dr Siti Hasmah lagi.

Beliau juga menyatakan rasa kecewa atas sikap segelintir masyarakat yang masih enggan untuk mengambil suntikan vaksin meskipun sudah membuat pendaftaran.

“Saya dapati sehingga hari ini ramai yang telah divaksin, Alhamdulillah tahniah saya ucapkan. Ini satu kebanggaan.

“Namun terdapat juga daripada mereka yang telah daftar, tetapi tidak hadir ke pusat vaksin, ini sangat mengecewakan.

“Ada laporan mengatakan sehingga 10,000 orang tidak hadir ke temu janji vaksin. Kenapa ini berlaku?

“Ada pula sesetengah orang yang tidak bertanggungjawab menyampaikan dakwah palsu berkenaan vaksin, Ini semua tidak benar, kita perlu percaya kepada sains,” tegas Dr Siti Hasmah, 95, yang memperoleh suntikan vaksin COVID-19 jenis Pfizer-BioNTech bersama suaminya pada 7 Mac lalu.

Dr Siti Hasmah turut menasihatkan orang ramai supaya jangan takut untuk menerima suntikan dan memberi jaminan bahawa ia adalah selamat.

“Jangan takut divaksin, saya bersama suami saya sudah ambil vaksin sebanyak dua dos. Alhamdulillah, sehingga hari ini tidak ada apa-apa perkara pelik berlaku.

“Oleh itu, sekali lagi saya nasihatkan patutilah SOP (prosedur operasi standard) dan sedarlah bahawa COVID-19 ini amat bahaya,” tambah beliau lagi.

Untuk rekod, jumlah pendaftaran vaksin kini telah mencecah hampir 45 peratus melibatkan pendaftaran sebanyak 10,850,160 individu.

© 2021 Astro AWANI Network Sdn. Bhd. (535275-D) All Rights Reserved.
Source: <https://www.astroawani.com/berita-malaysia/covid19-itu-nyata-kerajaan-perlu-wajibkan-pengambilan-vaksin-tun-siti-hasmah-299842>